

Na osnovu člana 47. stav 6. Zakona o veterinarstvu u Bosni i Hercegovini („Službeni glasnik BiH“, broj 34/02), federalni ministar poljoprivrede, vodoprivrede i šumarstva d o n o s i

P R A V I L N I K
O POSTUPKU ISPLATE NADOKNADE ŠTETE ZA NEŠKODLJIVO
UKLONJENE SEROPOZITIVNE ŽIVOTINJE

Član 1.

Ovim Pravilnikom se propisuje postupak isplate nadoknade štete za neškodljivo uklonjene seropozitivne životinje, nastale prilikom provođenja propisanih mjera suzbijanja i iskorjenjivanja zaraznih bolesti životinja.

Član 2.

Vlasnik životinje koja je neškodljivo uklonjena u postupku provođenja mjera za suzbijanje i iskorjenjivanje zaraznih bolesti od posebnog interesa za Federaciju Bosne i Hercegovine (u daljem tekstu: Federacija) i zoonoza, ima pravo na nadoknadu štete ako je:

- a) bez odgađanja prijavio sumnju na zaraznu bolest životinje, najbližoj veterinarskoj organizaciji;
- b) obavio propisano preventivno vakcinisanje u određenim vremenskim periodima, kao i dijagnostičko i drugo ispitivanje životinja;
- c) obavio propisano obilježavanje životinja.

Član 3.

Vlasniku seropozitivnih životinja neće se isplatiti nadoknada ukoliko:

- a) se bolest pojavila tokom uvođenja novih životinja u stado, koje nemaju propisane potvrde o zdravstvenom stanju;
- b) se bolest pojavila tokom propisanih ispitivanja u međunarodnoj trgovini (karantin);
- c) životinje nisu obilježene propisanom ušnom markicom;
- d) nije poduzeo propisane ili naređene mjere za sprječavanje i suzbijanje zaraznih bolesti;
- e) je kod pčela oboljelih od američke gnjiloće tok bolesti stariji od dva mjeseca;
- f) dopremi životinju iz nezaraženog u zaraženo ili ugroženo područje ili iz zaraženog i ugroženog u nezaraženo područje;
- g) se bolest životinja pojavila za vrijeme pašarenja ili žirenja na zabranjenim površinama, odnosno ako se zarazna bolest pojavila radi nepoštivanja naređene mjere obaveznog čuvanja životinja na ispaši ili žirenju;
- h) zahtjev za nadoknadu nije podnesen Federalnom ministarstvu poljoprivrede, vodoprivrede i šumarstva (u daljem tekstu: Federalno

ministarstvo) u roku od dvadeset i osam dana, od dana neškodljivog uklanjanja životinja, osim u slučaju iz člana 9. stav (2) ovog Pravilnika;

Član 4.

(1) Nadoknada za neškodljivo uklonjene životinje, sirovine, odnosno predmete određuje se prema tržišnoj vrijednosti na dan neškodljivog uklanjanja.

(2) Ako je prinudno zaklana životinja ili djelomično oštećeni predmet, odnosno sirovina u cijelosti ili djelomično još upotrebljiva, nadoknada će biti umanjena za vrijednost još upotrebljivog dijela.

Član 5.

Procjenu vrijednosti životinje i predmeta utvrđuje Komisija koju imenuje kantonalno ministarstvo nadležno za poslove veterinarstva (u daljem tekstu: kantonalno ministarstvo), u čijem sastavu obavezno mora biti doktor veterinarske medicine.

Član 6.

Postupak za isplatu nadoknade pokreće se na zahtjev vlasnika. Zahtjev se podnosi kantonalnom ministarstvu u roku od sedam dana od dana izvršenja neškodljivog uklanjanja životinje. Zahtjev se podnosi na Obrascu zahtjeva za nadoknadu štete koji se nalazi u prilogu ovog Pravilnika i čini njegov sastavni dio.

Član 7.

Vlasnik podnosi obrazac zahtjeva uz koji prilaže slijedeću dokumentaciju:

1. pozitivan laboratorijski nalaz koji je dobiven konfirmacijskom metodom;
2. rješenje nadležnog veterinarskog inspektora kojim se naređuje provođenje mjera;
3. zapisnik Komisije o neškodljivom uklanjanju;
4. zapisnik Komisije o procjeni štete;
5. kopiju pasoša za životinje.

Član 8.

(1) Nakon provedenog postupka za utvrđivanje prava na nadoknadu štete 50% sredstva osigurava i isplaćuje kantonalno ministarstvo.

(2) Na osnovu dokumentacije iz člana 7. ovog Pravilnika i rješenja kantonalnog ministarstva o pravu vlasnika na nadoknadu, Federalno ministarstvo isplaćuje vlasniku preostalih 50% od procijenjene vrijednosti životinje.

Član 9.

(1) Kantonalno ministarstvo je dužno odobrene zahtjeve dostaviti Federalnom ministarstvu, na isplatu nadoknade u skladu sa članom 8. stav 2. ovog Pravilnika najkasnije u roku od **dvadeset i jednog** dana od dana prijema zahtjeva vlasnika neškodljivo uklonjene životinje.

(2) U slučaju da kanton nije usvojio budžet za tekuću godinu, kantonalno ministarstvo je dužno odobrene zahtjeve dostaviti Federalnom ministarstvu u roku od dvadeset i jednog dana od dana usvajanja kantonalnog budžeta.

Član 10.

Troškove eutanazije životinje i dezinfekcije dvorišta, obora i staja snosi kantonalno ministarstvo.

Član 11.

Troškove nastale ukopavanjem ili spaljivanjem neškodljivo uklonjenih seropozitivnih životinja snosi općina.

Član 12.

Danom stupanja na snagu ovog Pravilnika prestaje da važi Pravilnik o postupku isplate nadoknade štete za neškodljivo uklonjene seropozitivne životinje ("Službene novine Federacije BiH", br. 23/08, 47/08 i 34/09)

Član 13.

Ovaj Pravilnik stupa na snagu narednog dana od dana objave u „Službenim novinama Federacije BiH“.

MINISTAR

Broj: 10-02/1-2156-1/12
Sarajevo, 22.10.2012. godine

Jerko Ivanković - Lijanović

**Prilog: Obrazac zahtjeva
za nadoknadu štete**

(Ime i prezime vlasnika, JMBG)

(adresa)

(telefon)

**Kantonalni organ uprave nadležan
za poslove poljoprivrede, vodoprivrede i šumarstva**

PREDMET: Zahtjev za nadoknadu štete

(podnosilac zahtjeva)

U prilogu dostavljam:

1. Transakcijski račun banke _____
(šesnaestocifreni broj)
2. Broj računa (partije) vlasnika _____
3. Pozitivan laboratorijski nalaz koji je dobiven potvrđivačkom metodom;
4. Rješenje nadležnog veterinarskog inspektora kojim se naređuje
provođenje mjera;
5. Zapisnik komisije o neškodljivom uklanjanju;
6. Zapisnik komisije o procjeni štete;
7. Kopiju pasoša za životinje